

2 TIMOTEO

É Kálara Beañ Timoteo

Mibóló

1 ¹ Pablo, ápostol Kristo Yesus ákála nkómánn Nzamá, amvála ané ngaá ye éniñ é ne ébe Kristo Yesus, ² á mfá Timoteo, ndzindziñ mwán wóm: Abwará, ya nyénánn engóngóó, ya é mvwaá Tará Nzamá, ya ébe Kristo Yesus Ntí wea.

Ávé akíba

³ Ma vé Nzamá akíba meé síman wa kaa ásim omos ye alú á meyaglán mam été. Éñe ma séan ya ñí ya osímánn mfúbánn amvála ané bímvámmvám byam byá bí ngá bɔ fe dɔ, ⁴ meé bíra wa kómo yén á mfá ye ná me tɔbɔ ndzálánn ya mesán, éyɔɔ ma síman é míige mwe; ⁵ meé síman é mbwínánn ó ne kaa meduk ó ne ébe wa, éwí a ngá tara tɔbɔ ósúsúá ébe éñe mvám Loida, ya ébe ñuá Ewunise; me tɔɔ ya mebúnn ná, ébe wa fe ntéññ mbóó.

É wéá eséññ Timoteo

⁶ Dzam te édo, ma vé wa osímánn ná ó bera bwaa é ndúán é dás Nzamá é ne ébe wa, éñí o ngá ñɔɔ ákála mbélánn é mó mam. ⁷ Amú ná Nzamá eé ndzí bía vé Nsísim áyeña, fáve éwí ye á nguú, ya édziññ, ya fe ádzwée osímánn. ⁸ Éde, o táa wók é nganiá Ntí wea osoán, ngé ki ma, é mwann mbok weñ; fáve ná, wa ñɔɔɔ fe ngap bía wa ébe nyénánn bindáglé ákála mbamba fwéñ, amvála ané é nguú Nzamá é ne, ⁹ éñe a koro yaá bía, a lwée yaá fe bía ya ékígá é ne eki, se ya mibɔann myea, fáve amú ntélán mam weñ ya mvóm, ébí bé ngá vé bía ébe Kristo Yesus kaa ná mvelann byém ó bɔ. ¹⁰ Édo éndagá, é léreban yaá ya áasian nkoro wea Kristo Yesus, éñí a ngá tsam awú, véa a kúlu eniñ éyéá été, étɔɔ ñúú é ne kaa ábweñ ákála mbamba fwéñ. ¹¹ Édí te édo, bé ngá téle ma nkat fwéñ, ya apostol ya fe nyágale.

Pablo mwann mbok

¹²Akála te édo fe má dzuk ya mam méte, ve mää wók osoán, amú ná ma yem nzá me bwíni yaá, me tóó fe ya mebúnn ná a ne nguu ye ábaale ntam wóm akekwiñ mos te.

¹³Beegé ámvála efonann bebébélá meyágalé o ngá ñoŋ ébe ma, ya mbwínánn, ya édziŋ été ébe Kristo Yesus. ¹⁴Baalé é mbamba ntam bé kee yaá wa ákála Mfúfúp Nsísim a tóó ébe bía.

¹⁵O yem yaá edí ná, é bot bése bé ne Asia bé mana yaá ma álama, ébó bé ne Figelo bá Ermogenes. ¹⁶Ntí á yénŋe é ndá bot Onesíforo engóngóó, amú ná abwiññ biyoŋ a ngá bɔ eé vé ma nguu, eé ndzí ki wók étóó mwann mbok dam osoán, ¹⁷fáve ná, ñí a tóó á Roma, a ngá bíra ma dzéŋ, a koan fe ya ma. ¹⁸Ntí á líkge ná á koan nyénánn engóngóó ébe mos te. Wa wa túga fe yem ámvála a ngá belan ya ma abwiññ biyoŋ Éfeso.

Míduúik Ápostol

2 ¹Ve wa, é mwán wóm, ñoŋŋe nguu ébe é mvɔmm é ne ébe Kristo Yesus. ²Éde é mam o wók yaá ébe ma ébe ású abwiññ bengañiá, keegé mɔ bebébélá bé bot bá ye tɔbɔ nkɔkgán, á mfá ye ná bá bé yágale fe é bot bevóó.

³Ñoŋŋe ngap ébe nyénánn bindáglé amvála ané é mbamba mwann bénzima Kristo Yesus. ⁴Mot enziŋ ye a ne eséññ bénzima áá tsinan ya eséññ okira efé ye éniŋ dzí, á mfá ye ná á vé é mot a ngá ñoŋ ñí eséññ bénzima nlém mesán. ⁵Ntéññ mbóó fe, é mot aa ke mekatan, áá wún ngé áá ke mekatan amvála ané metsiŋŋ méye été mé ne. ⁶Mbeñ mefúp aa bɔ eséññ, aa yian bɔ é mot ósúá ye aa ñoŋ ngap bibumá. ⁷Túga síman é mam ma kóbo ya wa má, amú ná Ntí éñe aa ye wa vé fak ébe dzam áse.

Míduúik Kristo

⁸Símanján Yesukristo, éñí a wómo yaá miwúán été, mot ye é mvɔŋ bot David, amvála ané é mbamba fwéñ wóm a ne, ⁹Akála te édo fe ma dzuk ya bindáglé, akekwiñ ya nkeán mibok, amvála ané mbo abé. Ve éfiá Nzamá é sés á mbok. ¹⁰Ya dzam te édo, ma nzomo ásesé ákála mitópban mí bot, á mfá ye ná bá bé ñoŋ fe akoroga ye mbéámbéá dúmá é ne ébe Kristo Yesus.

¹¹Bébélá efíá éñe ñí ná:

Amú ná ngé bí wú yaá bíabe bó, bía ye fe niŋ bíabe bó.

¹²Ngé bí tɔbɔ yaá mbán, bía ye fe dzwée bíabe bó.

Ngé bía kat ñí, ñí aa ye fe bía kat.

¹³Ngé bí sés bebébélá bé bot, ñí aa laŋan bebélá mot, amú ná a sés kat émyen.

Minéneá beyágale

¹⁴Vá b́w osímánn é mam má, weé kpéá b́w ósú Nzamá ná, bé sáale mikéá mí ne kaa eban, akála ná mí sés ya abúánn enziṇ, myá myá ke fe ya é bot bá wók myó ádzímlé. ¹⁵Wámyen wa bíragá fe dzéṇ ná o téle wámyen ósú Nzamá o tɔ́w nkyabán, mbo biséññ éé belé ddam enziṇ ye áwók osoán, eé t́uga lére tételé b́bélá efíá. ¹⁶Ve sáalé é nzeze nkóbo é ne kaa mfí, amú ná dá ye keéke ya mot á ékúkwat été; ¹⁷é nzeze nkóbo deba da ye mana ñeṇ amvála ané mora ebɔ́w f́óó, néa éñe Emeneo bá Fileto bé ne, ¹⁸ébá b́ete bé lés yaá á b́bélá été, b́eé dzó ná nwómán miwúán ó bɔ́ban yaá, éde bé ngá nzaman mbwínánn bot benziṇ.

¹⁹Ve, é ñá mbókga Nzamá ñí á téle kaa áfógan, wa ó belé sitám te, “Ntí aa yem é bot bé ne áabeñ,” ya, “Édo, éñí áse aa lwée éyola Ntí á kólogé ékúkwat été.”

²⁰Édo é ne ná á mora ndá été d́eé sés fáve ya bibyetga bí koṇ ya ngoós etámm, ve a belé fe bibyetga bilé ya ébí sí, bivɔ́w binziṇ bí ne á mfá ábelan ya byo ya ngaṇṇ, ébí bivɔ́w byá á mfá nzeze mbelán. ²¹Ya ddam te, ngé mot enziṇ aa tɔ́bo mfúbánn ébe é mam má, aa ye bo ébyetga é ne á mfá ngaṇṇ, ntélán eki, ya eban ébe Mása, nkomann á mfá mbamba mbɔ́ann óse.

²²Vé, t́upge b́ivéé bíye étɔ́w ndómán, dzéṇṇe nzósoó, ya mbwínánn, ya edziṇṇ, ya mwaa, fufúlu ya é bot bá lwée éyola Ntí ya nlém mfúbánn. ²³Tépgé medzó mé akúkút ya é má midzímán, weé yem ná má sɔ́ ya mitéé. ²⁴Éde éñí aa séan ya Ntí ñí áá yian bo mot mikéá, fáve ná é mot a ne esós ébe bot bése, nkɔ́kgán á mfá ávé ayágale, ya fe edzíp. ²⁵Éde eé vé melépgá ya mbamba nlém ébe é bot bá sóánn, ngé e ne bo tám enziṇ ná Nzamá aa vé b́w édzoban dá ke ya b́w ná bé ñɔ́ṇ b́bélá; ²⁶éde ngé bé biñ kén, bé t́up ólám débale, éñí bé ntɔ́w mikómm á nkómánn weñ été.

Ángónó abé ye métám má śugan

3 ¹Ve wa yian yem é ddam dí ná, mélú má śugan má, metám mé ne ángónó má ye sian. ²Akála ná bot bá ye bo ná bá dziṇ bébyen, bedziṇṇ moann, bebo benzeze mevágá, bebo bingún, bebyana bot, bebo meló ébe beéséá, be kaa álán mbeṇ, be kaa ngaṇṇ, ³be kaa eñúñuṇṇ, be kaa kómo awókgán, be boro bot mam, be kaa ádzwée nlém, mingéngét, bevíni mvéáñ, ⁴bekuan bot, be kaa átára tém, betɔ́bo ndzálánn ya engún, bedziṇṇ b́ivéé bé lígi ádziṇ Nzamá. ⁵Bá lére ná bé dzálá mbamba nyébé, ve bá b́eé kat nguu nyébé te. Lúmṇe memvála mé bot méte mvús.

⁶Amú ná ébá b́ete bé ne é bot bá duman mendá, b́eé ke ya ábíbiníngá é ne ndzálánn ya misémm á mikómm. Biningá b́ete b́ivéé mendzaṇ ya mendzaṇ byá dzwée b́w, ⁷bá yága tám áse, ve bá kaa kwíñ tám enziṇ á nyemann b́bélá. ⁸Ntéññ mbɔ́w ané Janes bá Jambres bé ngá tébe Moisés

á ngamm áyát, amvála te fe ébá béte bé tébe yaá bébélá ngamm áyát; é bot osímánn ó mana yaá wú ntuk. Éde, á mfá mbwínánn bé ku yaá. ⁹Ve báá ye bera ke ósú, akála ná ndzímán weba wá ye léreban éyéá été ósú bot bése, amvála ané dá é ngá boban fe ya bot béte.

Ndzénán bot ásí ákála mbwínánn

¹⁰Ve wá o túga yaá bee áyágale dam, ya éniñ dзам, ya ntélán mam wóm, ya mbwínánn wóm, ya édzip dam, ya edziññ dam, ya ánzomo dam, ¹¹ndzénán ásí, ya midzuúk myam, amvála ané ébí me ngá yén Ántiokia, ya Íkonio, ya á Listra. Ámvála ndzénán ásí te ma me ngá nzomo dо! Éde ébe ásesé te, Ntí éñe a ngá koro ma. ¹²Ve é bot bése bá kómo niñ eniñ nkanññ ébe Kristo Yesus, bá ye dzuk ye ná bá dzén bó ásí. ¹³Ve bembéa bé bot, ya beduk bot, bá ye keéke ósú bá duman abé été, béé duk é bot bevóó, bébyen bá béé dukbán fe.

Éban kálara Nzamá á ne ya dо

¹⁴Ve wa tɔbɔgé é mam o yága yaá été, o yébe yaá fe mɔ mvéáñ, weé yem ébe nzá ó ngá ñɔñ ayágale. ¹⁵Ya ná, ásó ye á mɔññ, o yem yaá Mitsili mí ne eki, émí mí ne wa vé é kén dá ke ya wa ákoroga ákála mbwínánn ébe Kristo Yesus. ¹⁶Ntsili óse ó ne évúnj dá só ébe Nzamá, ó ne fe ya eban á mfá ávé ayágale, á mfá ávé mbámm, á mfá ásonján, á mfá áyála mot ya melépgá á nzósoó été, ¹⁷á mfá ye ná é mot Nzamá á tɔbɔ nkɔkán ya fe nkomann á mfá mbamba mbɔann óse.

Katge fwéñ éfiá Nzamá

4 ¹Ma kpéa wa ósú Nzamá ya édí Ntí Kristo Yesus, éñí á ntéle ná a nkún kík betetéa ya bewú misañ, ákála áasian deñ ya fe édzwée ngómán deñ. ²Katge éfiá, tɔbɔgé nkomann ané éyɔñ tám e ne mvéáñ ya éyɔñ tám e ne abé, ásonján, ávé mbámm, ávé melépgá ya abwiññ edzip ya ayágale. ³Amú ná tám da ye kwíñ, éñí bot bá ye bɔ kaa ánzomo áyágale é ne bébélá, fáve ná ámvála mikómánn myeba bébyen mí ne, bá ye kóán beyágale bá kɔbɔ bó é mam bá dziñ bá wók; ⁴béé vea bébélá á meló meba été, bé nga venan á mengann. ⁵Ve wá, tɔbɔgé ya kén ébe mam mése, nzomɔñé midzuúk, bóóge eséññ nkat mbamba fwéñ, dzálágé fe éséññ Nzamá dwe.

Mebúnn bekrísten

⁶Akála ná me ntóó bebeñ ná bá swii ma ané bivévé, é tám ma ke da é kwíñ yaá fe. ⁷Me bɔ yaá mbamba meyítán, me mana yaá mékatan mam, me baale yaá fe mbwínánn. ⁸Atée ye éndagá, bé nii yaá ma korona ye á nzósoó; éñí Ntí, nzósoó nkík misañ, aa ye ma kee mos te; se fáve ma etámm, ve ya fe ébá bésesé bá dziñ áasian deñ.

É mam má súgan

⁹Bíragá dzéŋ ná ó dzíga ma nzu yén. ¹⁰Amú ná, ya ádzin éniŋ dzi, Demas a lama yaá ma, á kēñ á Tesalonika; Kresente ñí á Galasia, Tito ñí á Dalmasia, ¹¹fáve Lukas etámm éñe a ne bía ñí.

Ñɔŋɔ Markos, o sɔ mína ñí, akála ná a ne ma ya eban á mfá éséññ Nzamá. ¹²Ve Tikiko maá lóm ñí Éfeso. ¹³Éde éyɔŋ wa nzu, nzaá ya ekót me ngá lík á Troas ébe Karpo, ya fe mitsili, ádaŋdaŋ émí bikop bétsít. ¹⁴Alejandro, nlwíñ bikyeñ, a bo yaá ma abé abwiññ, Ntí éñe aa ye ñí vé méyáán má yian ya mibɔann myeñ. ¹⁵Wa tɔbɔgé fe ñí ya nkée; akála ná, a bira yaá ke é fwéñ bía kat á ngamm áyát.

¹⁶Eyɔŋ ósúá me ngá vé eyalann, mot enziŋ éé mbé á mfá wɔm, fáve ná bésesé bá mana ma lama; bé táa ki bó áláŋ ebúk te. ¹⁷Ve Ntí éñe á mbé á mfá wɔm, éñe fe a ngá vé ma nguú, á mfá ye ná ébe ma, nkatann fwéñ ó dzálában ye fe ná bot bésesé béye meyɔŋ mefé bé wók. Éde me ngá tɔbɔ nkoránn ébe ánu mgbemgbem. ¹⁸Ntí éñe aa ye ma koro ébe mbéa mbɔann óse, éñe fe aa ye ma baale á mfá ébe édzwée ngómán ye á dzóp deñ. Éñe á tɔbɔgé ya dúmá mbéámbéa ya mbéámbéa. Amén.

Mibóló myá súgan ya meyáán

¹⁹Bérágán ya Priska bá Akila, ya é ndá bot Onesíforo. ²⁰Erasto aá lígi á Korinto, ve Trófimo ñí ya maá lík nkúkwann á Mileto. ²¹Bíragá dzéŋ ná ó nzu kaa ná metám mé mveŋ ya avép bí sian. Ewubulo aa bérán ya wa, ya Pudente, ya Lino, ya Klaudia, ya fe bɔbédzaŋ bésesé.

²²Ntí á tɔbɔgé ya nsísim we. Mvɔmm é tɔbɔgé ya mína.